

武林往哲遺著

奚囊蠹餘卷之十四

明 仁和張 瀚 撰

雜著

貞女傳

夫詩首關雎重化始也孰謂閭閻微賤閩閩柔婉非有詩書禮義薰陶母儀傳訓爲之挈護而能矢心從一金石不渝非夫天理民彝率性爲道者哉陝以西周召所嘗過化遺風宜爾矣作貞女傳曰楊貞女者華陰通洛里人也年十六父雄納潼關郭恆聘許以爲妻潼華之俗婚嫁論財恆以不足於貲不得娶將牟利商販間遂去入楚居楚又不能卒致贏益留滯楚當是時人謂恆

已更娶楚女潼華富貴人又爭致之雄於是謀改適女
女不可曰業已許女郭氏卽死不二矧恆在邪已又斷
髮白誓雄旣不能奪女志訴諸縣令微諭之知持堅不
可奪聽令自裁女廼益深晦藏謝絕鉛華見聞屋故傍
土崖卽崖半爲營窟獨處其中垂鐵繩攀緣上下女旣
入輒引繩入窟雖家人不得仰窺端居不事事亦無怨
慕凡厯寒暑二十六年而恆還自楚時女已四十三歲
始成禮偕老焉

虎林生曰語云輕諾寡信以謂已諾必誠不愛其軀故
車也延陵季子心許人劍卽死不負千古誦義豈非人
之所謂賢豪者邪貞女巖棲穴避若將終身垂老必偕

夙約一念誠信可與昔賢比倫矣士君子竊許國之義
貞潔之操不聞甚者猶懷二心雖儒衣冠乎曾不若婦
人女子悲夫

跋畢子石祿命卷

夫五行之秀人得以成形性以多偏駁是故人之難全
也迺其清濁厚薄倍蓰異齊區別於輕重毫釐間是所
謂命而精微奧眇非夫知慮所及也夫子蓋罕之至立
教亦惟卽已定之富貴貧賤夭壽曰是卽命示不得倖
致苟免則已若必一一知來曰回殤由厄賜溫裕瞿有
嗣云云豈惟聖人不能卽造化亦不屑屑爾是卷畢公
所推子石使君命理余三復之皆本所生支干與歲運

相值較量生尅平頗著爲休咎蓋諄諄淵冰之戒其要
居貞順應俟命樂天非日者致期取應淺鮮不經語此
大易消長之理吾儒神知之術可易言哉使君大畜
撝謙處睽敦艮當顯仁之時深藏用之慮有以夫淵源
之學甯獨奉是周旋已邪媿余學易未能漫書嘉慕之
意云

跋廣居交遊卷

右先朝諸名公翰墨遺昔文襄公子廣居者詞義婉變
締好奚啻膠漆乃廣居明經登科兩貳州郡厯廿載沈
鬱以歿夫文襄爲國名臣廣居象賢登進深結巖廊爭
相推譽稍一攀援何慮通顯卒不爾諸公畧朋比公仕

使耶廣居安義命薄榮祿邪世多種露栽雲蘿攀驥附
謂能投功名之會比於廣居何如耶廣居孫一書君攜
卷出示妄綴斯言

列祖像讚并序

夫衍餘慶者本諸世積監成憲者裕乎後昆儀
刑儼若干永思繼述允懷于克肖遺謀不遠垂
範在茲迺擬諸形容丹青猶麗而稽於蘊奧琬
琰難名爰命蕪詞庶存梗槩云爾

於赫我宗肇迹伊洛南扈宋蹕喬止雄廓眷此桑麻時
奠耕鑿山川效靈一廛始拓迨我高祖介然磊落識悉
典墳文綺金艘高軼侯王遠引巖壑玄真志魚孤山籠

鶴帳底梅花杯中荷葉七政周髀六經笥篋培我弘基
啓我儒業偉曾繼志溫溫恭懿忘已宜人以義制利勞
矣謙謙眇焉事事廊廟隱施邱園高賁卓犖不阿允毅
無愧伯祖嗣哲頤巧於拙克勤幹蠱益振丕烈百忍身
謀一誠心訣荆樹同春芝蘭森列命服晚榮薄揚幽節
載稽永福內德孔淑桃夭化洽蘋蘩禮肅朗宣四教敦
睦九族歷世無間永底雍穆昌我庶嗣而康而祿孰是
開先貽燕惟穀言念本源瞻此瑤軸

王處士像贊

繫何人兮貌古神凝若先民之遺直兮非予之所識也
是歌咏洎龐之天耕鑿沃衍之域喻郊駟之逕馳眇紛

華子蹴屣衍邱園之容與秘巧慧于惓惓者耶古聞擊壤亦云抱甕匪斯人之徒與溷泰履于幽貞覺冥寰之幻夢者與

錢通政見齋像贊

覩衣冠之儼若挹謹愿之溫然祿旣厚以心下齒欲邁而神全道協淳良業專名姓大德曰生比權司命藏慧運神以隆休慶金液涵精寶餌駐色馴鹿與遊靈鶴與息坦慮存誠以頤中極商山羽翼元功茂密巧隨泰俗與衆同卹斯金門之大隱兮信通儒之仁術也

野亭馬公小像贊

質稟五行之純道通四聖之理宰邑倅郡時行則行惇

倫薄祿時止則止身世流雲功名敝屣一觴一咏興有
似乎陶潛見大心安樂不改於顏子雖被服如飛仙實
縉紳之高軌也

曹隱君像贊

憶故老之芳風覲遺容兮孔淑似內秀而多聞乃藏輝
以示樸世姦利兮蠅營獨履仁兮龍伏族狐疑兮啓嫌
甯螻屈兮終睦詩書開文藝之先禮讓貽家庭之穀包
荒媿逋竊之心苦節破侈靡之俗信身潤而情逸式如
金而如玉是謂隱君子兮名無辱

自箴

人皆有善爾獨何長自用則小取善無疆好而辟樂而

荒辯而逞思而浪難持者志易隘者量悔生於戲譎氣
暴於徬徨務恬淡以久要遵易簡爲周行正大自不屈
無妄乃有常靜御動經緯章同而異不易方守爾防休
且光

養愚軒箴

并引

大名郡齋後隙地半畝許中有小軒三楹四隅
雜植槐柳蒨蔚幽邃不減山林歲久稍敞予莅
治之明年撤而新之事閒卽默坐其間時閱老
子至爲治非以明民將以愚之予幡然悟曰嗟
乎凡今之治功尙精明績著奇偉運智攄謀孰
非明民而乃去彼取此子云民可使由不可使

知唐虞之民耕鑿飲食忘帝力於何有孰明孰知哉堯舜神化宣聖昌言允協斯道非玄虛也因題其軒曰養愚復作箴自警云

維天降才本無聖愚長無師友蒙困則愚取善者聖自用者愚好仁無尙不學猶愚玄德大順去智以愚至人處世藏暉自愚甯武奮大節以成愚莊生蘊大智於若愚不徑不寶柴也固愚默識心通回也如愚博聞彊記聊以破愚困知勉行庶以明愚閑邪守默靜以養愚開誠布公動以行愚念下民至神而匪愚畏上帝居高而鑒愚狙詐萬端率我性愚喜怒千變任我情愚人謀就我畢盡其愚我謀就人不欺其愚坦蕩蕩兮予懷何愚

闇悶悶兮予政何愚予將效古之以直愚無甯襲今之
以詐愚

孟銘六首

八閩縱橫命將徵兵臣職監儲給餉徂征鯨鯢旣獲武
功告成恭承大賚永侈恩榮

嶺表肆征監軍會甯霾曠前除海山廓清效有勞績仰
辱綸音藩參踈迖拜賜帑金

嘉靖癸亥蕩平閩海臣始與謀微勞見采文綺輝輝南
金皚皚三錫榮膺垂世億載

歲寅月酉節屆萬壽廷尉趨朝鵷班適筵天王燕喜慶
均且厚奕葉無忘顧諟銘鏤

皇極鼎新紫宸壯建星拱微垣天開別殿臣貳司寇式
瞻歡忭隨例頒恩無功顏覲

歲在丁卯始元隆慶䟽鑿濟沛河渠底定猥役督漕謬
承恩命鎡金斯兼襲衣孔覲

奚囊蠹餘卷之十五

明 仁和張 瀚 撰

墓志銘

江西南昌府通判野亭馬公墓志銘

余外舅野亭馬翁以嘉靖庚申十一月十九日歿先是翁自爲志曰余讀陶淵明與諸子疏云天地賦命生必有死自古聖賢誰能獨免逮卒自爲挽歌祭文謂非齊死生而委順達化者乎予生七十四年居林下二紀矣百齡易促歸盡有期愧以譴行微名曷堪昭世然前無所稽後將何述勉爲志之謹按世譜系出伯益春秋時趙王子奢號馬服君子孫因以爲氏世家河南郡屬扶

風吾宗實宋太保默之後思陵南渡扈蹕家杭繼遷海
昌代有顯者宋萬十一宣教以功能祀于鄉始祖搢元
嘉興路總管同知高祖昭杭州路總管府判從伯祖維
周海道萬戶世祖用周繼同知後抱道隱處海門號則
天真居士子昭昭生辰辰贅于陸籍芳林鄉實爲吾曾
祖以字行曰子春生吾祖壽是生先考履齋公廷玉蚤
有文名格于時命應貢厯光澤教諭母郭氏成化丁未
四月十六日生宗俊于福州學宮旣長傳家易學補郡
學弟子員每督學使者較文咸眞優等丙子舉于鄉庚
辰下第以親老乞就祁門教諭戊子釋先人憂補弋陽
尋陞直隸來安知縣壬辰三載考績恭遇皇上元祥推

恩贈吾父如子官母妻皆封孺人甲午進江西壽昌府
通判時母年八十餘遂以終養不赴配張氏政和主簿
錢塘張浩菴女淡泊同志白首伉儷子男長行健早世
次行陸女二長歸福建布政司右參政張某封安人次
鴻臚寺司賓署丞沈堇孫男亦龍縣學生本鳳岡族姪
文奎季子爲吾兒行健後孫女歸滑縣教諭程近齋子
淞業儒生平質任自持不逐時好簡言寡交人罕知之
始爲親祿仕終辭祿養親良順夙心家居讀書厭入城
府角巾野服人稱野亭先生時有素心人萬鹿園李响
樓相與往來庶幾二仲或招之遊亦間往不爲絕俗雖
兩罹回祿室廬蕩然無所動於中也此先生自敘云爾

先生抱道守正澹泊無營宦游十餘年所至不私一錢
在祁門以明理脩身率諸生揭紫陽白鹿洞規衍以經
傳俾知嚮往爲今日專務德化不事法術盡革浮費尤
謹貯積適歲大侵恃有備得無流亡撫臺某行縣入滁
過責供張至厲聲色先生曰吏本儒素不習奢靡請伏
不敏之罪某慙而去自是心厭折腰歸思不可遏矣會
有南昌之命弃官來還圖書數卷泰然自足郡大夫捧
檄詣先生先生辭謝使者三終不肯受獨靜處一室陳
書檮藻卽朝夕不自謀其於世俗交際炎涼毀譽甯有
介於胸臆哉先生每自比淵明某嘗爲文壽先生亦謂
神孚於靖節今以耳目覩記奚古今人不相及哉所著